



VÖG VOLAPÜKA.

,Daniil Morozov': redakan
ä vicifal,
,shido2308@yahoo.com',
,Ekaterinburg', ,Rossija' / Rusän.

Jäfidot soga bevünetik Volapükka.

YELOD 34^{id}. NÜM: 2. 2024 FEBUL. PADS: 9 jü 20.

O Volapükkaflens valöpo!

Primü yel at enotükob penedis tel de Volapükans paseta, sevabo de hiels ,Jean-Claude Caraco' e ,Abelardo Sousa'. Vödems at balidnaedo pepüboms fa ,Ralph Midgley' ün degyel milzültüm-jöldegid. Vemo danob eli Hermann Philipps, hikel etuvom in ragiv lönik ed edigitükom fomü magods materis et. Peneds pemäniötöl vemo enitedons obi; jonons, vio mens ti= mäda bukik äkomipons demü nol. Ettimo no äbinos fasilik ad dagetön fonätapenädi tefü püks nekomunik (keninükamü obsik), e pämod alik äläbükon levemo labani oka. Pö stad nünadefa, kel äkanon-la kodön nennoli, buk alik päreidon mu küpäliko, e legudiko ädalärnoy Volapuki. Äklülos, das Volapük ögeton slopanis e mastanis nulikis, do no övedon kosädame=döm valöpo pösevöl. Ejinos lü ob, das dü tim anik ,Ralph Midgley' äbüocedom, das äbinom-la Volapükcan balik in vol, ab suno äseirom Volapükcanis dabnik votik, kelans äpenons ne=mödikosi Volapüko, ab äkälälons püki at.

Nutimo stad binon vero güik. Fasilos ad dagetön lebukis le=mödik medü bevüresod, i kanoy tuvön bepenoti konfidovik Volapükka, ab... bundan tuvemik nünas tupon studi staböfik dina ömik. Töbo plöpoy ad doniokopiedön lemödoti pübotas, ab no tuvoy livüpi ad reidön onis. Volapük labon-li fütüri? Menef oka=non-li volfön ad lönedikön ad lifadinäds bevü nüns bundanik?

Vipöl oles gudikünosi valik redakan:

Даниил
Морозов

COGED DEGMÄLID SE „COGIKOS VOLAPÜKIK“

fa hiel Rupert Kniele (1887).

PÜK RIGIK („KNIELE“).

Ein neues Element.

In einer Schule wurde gefragt:
„Wie viele Elemente giebt es?“

Ein kleiner Junge erhob sich sofort und sagte: „Fünf.“

„Fünf, mein Söhnchen, du täuschest dich, welches sind die fünf?“

„Feuer, Wasser, Luft, Erde, Schnaps!“

„Schnaps, warum Schnaps?“

„Ja, mein Vater sagt immer, Schnaps ist mein Element, und da muss es doch wahr sein.“

VÖNA=VOLAPÜK („KNIELE“).

Lömin nulik.

In jul sembal päsäkos:
„Lömins limädom sibinoms?“

Pul smalik asustanom
foviko ed asagom: „Lul.“

„Li-lul, o sonil oba,
citolok, kioms binoms lul
at?“

„Fil, vat, lut, tal e filavin!“

„Li-filavin? kikod filavin?“

„O, fat obik aisagom:
filavin binom lömin obik, ed
atos vo mutos binön
velatik.“

VOLAPÜK PEREVIDÖL („PHILIPPS“).

Lömin nulik.

In jul päsäkos: „Lömins liomödotik dabinons-li?“

Pul smalik älöädöd sunädo ed äsagom: „Lul.“

„Lul-li? O hipul! pölol. Ats lul, kins binons-li?“

„Fil, vat, lut, tail e gein.“

„Gein-li? Kikodo gein-li?“

„Ö! fat obik ai sagom: Gein binon lömin* obik <, klu atos vo
muton binön veratik.“

KÜPET FA ,H. PHILIPPS‘.

* Vöd Volapüka perevidöl: lömin < malon löminis kie-mavik u löminis fol ma sev vöna. Neföro pagebon ad malön züädi pebuüköl u dinädis mödiküno palöfölis.

Kludo: *Gein binon lömin obik* → *Löfob geini bu valikos.*

Coged at no mögon in Vp. perevidöl.

POSPENÄD.

Cedob, das no plu sötob notükön cogedis Vöna=Volapükik fa hiel Kniele, bi klülos, das no äfagom ad prodön vödemis veräтик. Änitedos, ab no äfrutos.

Ba osteifülob fütüro ad vestigön vödemis fa hiel Schleyer ad setuvön, va vödems datuvala äbinons veräтиkums.

BESPIK BEVÜRESODIK.

,*Daniil Morozov*'. Pö votükam vödemas anik datuvala ini Volapük nuik suvo äküpob, das stül oma no binon fasiliко suemovik (leigodü penäds Volapükanas ettimik Fransäna=, Litaliyäna=, Rusänapükik). Pato fäkam levemik (sevabo vöds me els =ünö! =iküno < äfiniköls) ästunükon obi. Timakompenans ela Schleyer i no äjinons löfilön vödis somik. Söl: Iparraguirre < in pämod tiädü „Spän in lasam“ („Spanien pö kon-gred“, sevabo Volapükakongred bevünetik telid) ämäniotom, das pla fom: plidiküno < äbaiädöl ko pükälöns Deutänapükik, efe ko el „gefälligst“, öbinosös tikavikum ad gebön notodoti suemovikum pro pösods netas difik: „plidolös!“ (nu penoyöv elis „binolös flenöfik ad...“ u „lebegob draniko ad...“, ud igo „eke pabegos plütiko/draniko ad...“). Ye — to konsäls at — „Schleyer“ fümäliko äbleibom penön eli „plidiküno“ (ed igo semikna, if memob veräтиko, eli plidikünö!).

,*Hermann Philippss*'. Kludo no zesüdos, das fegebob timi obik demü vob somik.

Mastans ün tumyel 19^{id} äsevoms pükis mödik, ab no isuemoms mödikosi dö spik voik. ■

KONOTÜL TUMYELA TELDEGID.

Säkoy radionabroadöpe sovyätarepublikik:
„Lio herod hiela Krushhjov panemon-li?“
„Klopot yela: 1969“, broadöp gespikon.

← So herod ela Krushhjov: de yel: 1953 jü 1964 sekretan balid komitetanefa zänik paleta kobädimik in Balatam sovyätarepublikas < älogoton. ☺ ☺ ☺

Lits, klebamäplat, e sasenatrup.

Fa ,Frank Roger, tiäd rigik: ,The Lights, Some Band-Aid and the Hit-Squad',
ini Volapük petradutöl fa ,Hermann Philipps'.

Ei * malon vödis nekösömk finü vödem paplänölis.

Hiel Norman äseadom len penamatab föfio logetölo e steifölo ad dagetön tiketi dö primaset gudik pro padül alvigik oka as lotolautan* pö resodatoped flena gudikün okik. Kösömiko älifädom timi mödikum ad logetön föfio, kas ad penön jenöfiko. Ömna äsäkom ninälo oke, va äbinos leigoso pö alans. Ud ädabinons-li mens, kels ädopladons okis ed äprimons ad laipenön, e vöds äsüikons de doats oksik me flum lunik nenropik?

Täno äküpom pö el ,router' oka lampadili redik liti vifiko kurböli. Nilü on lampadils blövik lul ädabinons, kels no äkurbons liti oksik. Valodo lampadils mäl ädabinons, kels ätefons dunodis distik. Alo äniludom atosi – no äsuemom patädis kaenavik stumema leäktronik. Lampadil redik et föro äkösömon-li ad kurbön liti oka? Ud atos äbinon-li bümal säkäda kaenik? Ab val äjinon jäfidön nendöfiko, klu no äzesüdos bo ad kudön.

Azilogom ed äküpom litis nog mödikumis. Älogom onis pö nünöm okik, pö büköm, ed etflano in gul pö televidöm e telefonöm okiks: lits blövik, grünik e rediks. Anis onas äkurbons okis me smaliks timafagots* distik, votiks no ädunons atosi. Älöädom de stul ed äzigolom spidiko in löd oka. Id in kvisinöp lits mödik äbinons valöpo. Loged oma ästebon su smalabranafurnod*. Leigoso äbinons in slipacem, e jenöfiko valöpo in löd omik: smokitüvians*, plu=buonädakontagians*, dins alsotik älabons litilis smalik. Bisarö! Neföro iküpälom ad atos.

„Brefüpilö!” ätikom. Älogetom äl lampadils valik et, e süpo äsenälom, das ägelogons omi: omi kälädöls, omi daküpedöls. Dremäl ädaikon pö om. „Bos mifätilik is jenon”, ätisagom natemölo. „Kanob senälön atosi. Fädo bosí etüvob nu. Mögos-li, das desin seimik dabinton pö lampadils at? No te kurbons liti oksik, ab maletons lü ods. Kosädons ko ods, sedons nunis lü ods. Köls, kurbams, timafagots: val at binon kosäd me kot; me kot, dat nosi kanob suemön.” Igo no äsötom sevön, das seimikos äjenon.

„Ab kisi ye kanob-li dunön dö atos, nü etüvob osi?” äsäkom ninälo oki. „Ba lenosi osötob dunön. Ba pojutalienet eglepädon obi.” Tikod äbinon lusapik, das parats äkosädons ko ods ed ätrigons ta om.

Ba äkanom-li dunön sperimänti pülik: dunoti nendämövik, te ad geedön ladälatakedi oka? As sam äkanom-la tegön lampadilis et. Ad säkurbön onis

äbinon-la tikod vemo badik, ab ösüükönöv-la sekis nitedik ad deditükön onis de ods.

Ämeditom brefüpilo, täno ägolom lü banacem ad ramenön klebamäplati bosik. Äkötom oni ad tanedils ed äprimom ad tegön lampadilis. Pos minuts deg älvelogom valikosi ed ävestigom lödi lölik oka. Ineküpom litili nonik, valiks pitegons. „Pebleinüköls”, ätikom smilülölo. „Pesiölöls. Nog jäfidöls, nog nǖ e säkurböls, ab no palögöls.” No plu äfomons resodi jäfedik. Lampadils äsoelons, kosädazugots* valik piropons.

„Atosi bo mutoy zelön”, ätikom. Ägolom ini kvisinöp, äramenom ninädiani bira koldik, ed ägegolom lü nünöm oka. Nu ga sio äsötob penön bosi. Äleküpälom me tik oka ed äprimom ad vobön.

Latikumo pos minuts zao degluls ek ätoenon kloküli oma. Bisarö!, no äspetom seimani, e fümo no tü tim at. Ägolom donio lü yan, ed älogom manis fol: nämikans, kels älenlaboms leigedi blövik leigasotik ko siämäär mäk pö om nesevädk.

„Käl kaenik”, balan manas at äjonodom oki groböfiko.

„Säkäd kaenik tefü resod dabinon”, man telid äsagom.

„Mijäfid tefü notetaflum”, man kilid äläsagom. „Is, pö ol.”

„Dalobs-li nügolön ini löd ola ad zilogön?” man folid äsäkom. „No odulos lunüpo.”

Nes stebedön gespiki, mens fol at änügoloms joikölo omi flanio.

„Egitedob”, ätikom. „Lits et äfomons kosädaresodi. Ed ob ädunob saboti. Mans et odatuvülops kodi döfa. E täno kisi odunoms-li? Fümo no binoms te trup kälanas. Kälatrup me mans fol binädöl-li? Nö!”

Äklülikos pö om, das atos ökanon badikön vemo. „Esötob preparön gudikumo mesüli obik”, ätikom.

Mans ya ifinükoms vestigi viflik löda omik, ed ästüroms okis sui om.

„Kanob plänön osi”, äsagom, ab oms no ädaliloms. ■

Vöds anik in vödem löpik pegeböls (Linglänapük, Deutänapük):

kosädazugot – communication line, Kommunikationsverbindung;

lotolautan – (← sümü „lotodramatan”) guest author, Gastautor;

mijäfid – malfunction, Fehlfunktion.

plu-buonädakontagian – multiplug, Mehrfachstecker;

smalabran – microwave, Mikrowelle;

smokitüvian – smoke detector, Rauchmelder;

timafagot – (time) interval, Interval (zeitlich).

KONOT ELA ABELARDO SOUSA.

Fa ,Abelardo Sousa' (1920–1986).

Pelauton ün 1977, is pebükon ma pübot yela: 1981.



,Abelardo Sousa'.

Volapük, cedü ob, vo binon pük vemo jönik, fasilik e tikavik, ab lärn püka at eflagon de ob vobi e dedieti mödik. Ekö! bepenam naböfik jenotema at, kel eprimon ün yel: 1970.

Lefat obik: ,José Brasilício de Sousa' (9.I.1854 jü 30.III.1910) < äbinom profäsoran (tefü talav e jenav), stelavan, matematan, musigan e polüglotan. Daced oma pädasevon bevünétiko e nem oma komädon in „Enciclopédia Universal Illustrada Europeo-Americanana”, pübot yela: 1927.

,José Brasilício' ebinom studan balid Volapükä in zif obik: zif vönik: ,Desterro', adelo ,Florianópolis'. Evedom Volapükän gretik. Äspodom ai ko mastals mödik Volapükä in Yurop, de yel: 1888 jü 1895. Bevü spodans oma, äküpoyöv tidanis, musiganis, sananis, jenavanis e r., äs ,Auguste Kerckhoffs': mastal Volapükä, äsi presidan Volapükakluba ela ,Paris', ,Rudolf Mehmke' (,Darmstadt', Deutän), ,Franz von Möller' (,Kassel', Deutän), ,Richard Böger' (,Hamburg', Deutän), ,Rudolf Bischoff' (,Graz', Lösterän) e votikans.



,José Brasilício de Sousa'.

Spordan Yuropik laidik oma ebinom söl: ,Ludwig Zamponi' äsi profäsoran nivera di ,Graz' in Lösterän, kelan pos jenots yamik Volapükä-kongreda kilid in ,Paris' (dil glumidik jenotema Volapükä) evobom töbido i günü propagid püka ed igo epenom buki tefü buäds Volapükä bu püks bevünétik votik [,Zur Frage der Einführung einer internationalen Verkehrssprache', 1904].

Bevü papürs lemödik lefata obik etuvob penedabuki, voiko ninädöli kopiedis penedas omik numü luldeglul. Evipob ad tradutön penidis at ad kobükön onis pro buk obik tefü

lifajenäd lefata oba. Ab lio tradutön-li penedis at nes sevön Volapüki? Äbinob lo sfin <sagöl>: „Tivedolöd kläni obik ud olufidob oli!”

Äbinos vobod fikulik e ti nemögik, ab „nemögikos no dabinon”, äsagom lefat obik.

Balido, eprimob studi Volapükka medü vödaliseds e gramatanoms smaliks, kels pepreparons fa lefat oba. Vödabuks oma peperons. Epenob pösodes lemödik is in Brasilän tefü vödabuks e gramats. Änedob i remön onis pro studs obik, ab edagetob nosi!

Nek äsevon Volapüki u, if äsevons-la oni, num somanas äbinon so smalik, das äkanoyöv dakalkulön onis ad doats okik. Täno esludob ad penön bukatedanes e bukemes in Yurop e Tats Pebalöl, begölo kleilü-kamis tefü vödabuks e tidabuks Volapükiks. Du äspelob <benoseki>, ästudob ai, äyufidölo ai vödabukis <brefik pro püks> Linglänik, Fransänik, Deutänik, latinik e r., kö ävestigob stamädavödis, kels efomons vödastoki Volapükka. Äbinos gianagretavob! Äjinob binön el Champolion telid.

Se Yurop egetob nosi, toä äspodob laiduliko ko ,CDELI’ [Centre de Documentation et d’Etude sur la Langue Internationale] in Jveizän, e ko söl benodistik: ,Reinhard Haupenthal’: sperantan, kel enotükom ün 1974 buki ömik dö bibliograf Volapükka. Te bukem zifa: ,Konstanz’ (Deutän) esedon obe eli „Glamat blefik flento-volapükik” ela Johann Martin Schleyer (datikan püka). Binon bukil plagöfik, ab vemo brefik. To atos, eyufon obi mödikna.

Fino flen obik: profäsoran: ,Miranda’¹ esedom obe gramati sa vödabuki smalik Linglänapükik=Volapükik Meropana: ,Klas August Linderfelt’, penotüköli in zif: ,Minnesota’ (Tats Pebalöl) ün yel: 1889 <u 1888>. Buk at binon seledikün, e medü on ekanob ya studön e lärnön Volapüki, e fino tradutön penedis valik lefata oba ini Portugänapük!

¹ Profäsoran: ,José Pedro Miranda’ binom presidan ela ,Sociedade Ribeirãopretana de Lingüística’ e fünan ela ,Ribeirão Preto Esperanto Clube’ (1966) ed ela ,Instituto Esperantista de Ribeirão Preto’ (1973). Profäsoran: ,Miranda’, sosus esevom nitedi obik pro sperant, esedom obe bukis e vödabukis speranta pro studs oba (*küpēt lautana*).

Lärn at eflagon obe vo ti deleneito ävoböle yelis fol (nu binons vels). Poso efinükob buki, keli ai ädrimob ad penön: „Nolavan e Volapük” < in dils tel. Dil balid binon lifibepenam ela José Brasilício de Sousa as lekanan e nolavan. Dil telid ninädon jenotemi Volapüka in zif vönik: ‚Desterro’ — adelo Florianópolis — cifazif tata: ‚Santa Catarina’ (Brasilän), zif, kö lödob. Dil at ninädon penedis valik (55) ela José Brasilício pepenölis in Volapük e petradutölis ini Portugänapük. Dil at nog ninädon yegedis valik pepenöl in Volapük e dö pük at, penotükölis in gaseds zifa obik ün yels: 1887–1895. Töbidob ad notükön buki at, ab nen sek. Is, in zif oba, dabinon nited nemödik pro dins kuliva...¹

Tefü buk at, dabinons ceds gudik flenas kuliva gretik, bevü kelans <binom> profäsoran: ‚Paulo Rónai’: lautan e spikädan ko fam bevünétik, kelan eyufom obi mödiko pö studs obik Volapüka. Ab voiko nog spelob pöti gönöfikün. Ün yel: 1973 medamü söl: ‚Reinhard Haupenthal’ ereafob ad sevön, das Volapük, keli ilärnob, äbinon lemu vönädik. Volapük rigik ela Schleyer pifeafomon fa ‚A. de Jong’: vöna-pükavan Nedänik. Feafomam at evotükön vemo Volapüki rigik, keli ob ilärnob.

Ezesüdos pö ob ad studön täno Volapüki perevidöl, ibä Volapükans nutimik (ba jöls u degs) sesumü söl: ‚Donald Gasper’ (yunan Volapükik ela London) änesevons Volapüki rigik, ed ob änedom spodön ko ons ad plägön püki. E somo edunob osi. E fövob ad dunön osi. In tef at, elabob privilegi ad numön bevü kobovobans yufialik söl: ‚Johann Schmidt’: ciful Volapükaneфа, men sapik, flenöfik e vilöfik. Elärnob mödikosi de om. Söl: ‚Schmidt’ binom lautan buka: ‚Compêndio da Língua Universal Volapük’. ■

SAGODS ELA ,DAVID LYNCH’.

No sevob, kikodo mens spetons, das lekan labon-la siämi. Otans lasumons jenöfoti, das lif no labon siämi.

Ai lilob gespiki ot: Sanan obik ekonsälon obe ad no tikön dö dins äs somiks.

¹ Buk at pepübon fa daut ela ‚Abelardo Sousa’ ko tiäd: ‚O Sábio e o Idioma. Florianópolis: IOESC, 2002’ (*küpēt redaka*).

DOG ELAS ,BASKERVILLES'.

Fa hiel ,Arthur Conan Doyle'. Petradutöl fa hiel ,Oleg Temerov'.

Tradutod papübon bai koräkots pülik fa hiel ,Daniil Morozov'.

KAPIT VELID. ELS ,STAPLETONS' DI ,MERRIPIT HOUSE' (2).

„Ebo ini nams-li omik?” äsäkob.

„Soö! äbinom löpo in masad ettimo, klu no äkanob degivön oni ebo ini nams omik, ab egivob oni läde: ,Barrymore’, jikel epromof lovegivön oni nenzogo.”

„Älogol-li söli: ,Barrymore’?”

„Nö! o siör! äsä esagob ole, äbinom in masad.”

„If no älogol omi, ma kis cedol-li, das äbinom in masad?”

„Ga jimatan lönik omik sötof-la sevön topi, kö binom,” potacalal äsagom senälöfiko. „No egetom-li telegrafoti? Ifü pöl seimik söl: ,Barrymore’ < it olafädomös kusadi!”

Äjinos nenspelik ad laifövön dasäki, ab äklülikos, das to käfod hiela ,Holmes’ no älabobs blöfi, das ,Barrymore’ no äkomom pö ,London’ dü ettim. Büocedobös, das so äjenosöv, sevabo büocedobös, das man ot äbinomöv lätiikan, kel älogen siöri: ,Charles’ < as lifik, ed äbinomöv balidan, kel idatuvülon gerani nulik, ven etan igejomom ini Linglän. Kis äsekönöv-li se atos? Äbinom-li konfidovan votikanas ud älabom-li desini badik lönik? Demädi kinik äkanomöv-li labön ad dränälön famüli elas ,Baskervilles’? Ämemikob nunedi bisarik se dugayeged ela ,Times’ pisekötöli. Atos äbinon-li dun omik u du-not seimana, kel ästeifon ad tadunön disini omik? Dunakod tikovik balik ädabinon ut, keli siör: ,Henry’ < ilofädom, das üf famül pümplafükönöv isao, täno els ,Barrymores’ ödagetonsöv lödöpi kovenik e laidiki. Ab fe plän somik binonöv vemo bisarik, demölo disini dibälik e

feiniki, kel ekoedon-la vivön träpakäfodi nelogamovik zü baonan yunik. „Holmes’ it isagom, das säkäd kompliti-kum nonik päbliädon ome ünү sökod lölük gretik vestigas dastunüköl oma. Äplekob, ägegolölo ve veg soa-löfik glumidik, dat flen obik suno pülelivükömös de kudadins okik, ed ökanomös lükömön ad säbliön obe böladı fikulik at gidida.

Süpiko medit obik päropón fa tons futas rönöl pödü ob e vöga nemi obik äsevokädöla. Igüflekob obi, spetölo ad logön dokani: „Mortimer”, ab pisüpädob ad loegön dayagön nesevädikani obi. Äbinom man lövik mägik labü logod lupuedälik kälöfiko pijkeföl ko cügs kevöfik e herem linumayelovik; bälidotü yels vü kildeg e foldegs, lenlabü klotem gedik e stolahät. Tünabok pro sameds planavik älovelagon len jot omik, ed äpolom pabifana-filäti grünik me bal namas okik.

„Fümiko upardol mäpüdi obik, o dokan: „Watson!”” äsagom, du änilikom lü ob, natemölo töbiko. „Is: pö mä-rädän < binobs pöp grobälik e no stebedobs jonodi fomedik. Ba älitol-la nemi obik de flen kobädik obsik: „Mortimer”. Binob „Stapleton” se „Merripit House”.”

„Filät e bok oliks enotükons obe leigiko mödikosi,” äsagom, „ibä äsevob, das söl: „Stapleton” < äbinom nati-vestigan. Ab lio esevol-li obi?”

„Pivüdob lü „Mortimer”, ed älüjonom oli obe da fenät vobacema kötetavik okik, du äbeigolol. Bi vegam oba ed ola zugon äl lüod ot, esludob, das sötob vegamorivön oli ed ito nunädon obi ole. Bo — ma süad obik — siör: „Henry” < leno pefenüköm-li fa täv okik?”

„Stadom vemo gudiko, danöl!”

VÖDS NEKÖSÖMIK IN TRADUTOD PEGBÖLS.

ko herem linumayelovik = „flaxen-haired”
pabifanafilät = butterfly-net



PISÜPÄDOB AD LOEGÖN DAYAGÖN NESEVÄDIKANI OBI.

HIEL BOLEŚ.

Koned fa ,Maksim Gor'kij'. Petrudatöl fa ,Daniil Morozov'.

Sevädan semik ekonom obe sökölosi:

„Ven äbinob in ‚Moskva’ as histudan, so äjenos, das älödob nilädü jibalan „somanas“ (suemol-li?). Äbinof ji=Polänan, pänemof ‚Teresa’. Äbinof somo geilik, dofaheri=jilaban nämik älaböl logabobis blägik iko=boyumöl e logodi gretik groböfik, äsва me cüd pibecöpöli. Äjeikof obi

me nid nimälik logas dofik oka, me vögäd donöfik ä sümedöl folidvög, me duneds bökanasümik, me maged lölik gianagretik muskulagik okik maketajiselana... Älödob in masadacem, e yan cema ofik ätopon visü yan obik. Kösömo neai ämaifükob yani obik, if sevob, das äkomof lomo. Ab atos dido äjenon nesuviko. Semikna ämutob kolkömön ofi su tridem, in yad, e täno äsmililof lo ob me smilil, keli älecedob raviäliki e künidiki. No balna äloegob brietön ofi ko logs disipik, binön ön stad slapiik, smililön ön mod seimik pato nejönik. Pö jenets somik äsagof obe:

„Deli gudik! o söl: studan!”, ed äsmilof stupiko, dub kelos ävemükof lenaudi obik kol ok. Äfealotädoböv de löd at, dat ölelivükob obi de somiks kolköms e glidots, ab älabob cemili so plitiki, ko banorem so vidik da fenät, ed äbinos so takedik pö süt at... Äsufädob.

E sunädo du seimna gödo seatob su bed, steifülolo ad datikön kodüli, dat no ovisitob spikädatidodis, yan maifikon, e jiel Teresa nau-dodik at sagof laodo pö soliad me folidvög:

„Deli gudik! o söl: studan!”

„Kisi vilol-li?” spikob. Küpob, das logod ofa binon jemik, begik... Logod, kel nekösömon pö of.

„Sevolös! o söl! desinob ad begön ole duneti ömik... begö! odunolös osi pro ob!”

Seatob, seilob e tikob:

„Käfäd seimik! Atos binon steif ad dämön klini obik, e nos votik. Bemastolöd oli! o ,Egor’!”

„Nedob — sevolös! — sedön penedi lü lomän,” sagof, zuo so lebegölo, nelaodiko, jemiko.

„Benö!” tikob, „binosös, diabö! äsä plüdol!” Elöädob, eseidob obi leni tab, esumob papüri e sagob:

„Nükömolöd isio, seidolöd oli e dikolöd!...”

Nükömf, prüdiko seidof oki sui stul e ko logodanotod döbana lülogof obi.

„Soöl! lü kin pened binon-li?”

„Len veg di ,Warszawa’, lü zif: ,Święciany’, hiele Bolesław Kaszput...”

Fövot ponotükön.